

## ԱՐՇԻՊԵԼԱԳ ՀԱՅԱՍՏԱՆ

Հրատարակված է ՄԱՐԱՏ ՅԱՎՐՈՒԾՅԱՆ, [civilnet.am](http://civilnet.am), չորեքշաբթի, 10 ապրիլ, 2013

Ժանրի կանոններից հեռու է լինելու շարադրանքը, չնայած ժանրը հազիվ թե կանոններ ունի, ավելի շուտ ժանր էլ չկա: Միայն զգացումներ են: Զուտ զգացումներ, սուբյեկտիվ: Միտք փնտրել պետք չէ:

Ապրիլի 9-ին ամբողջ օրը զգացում կար, որ իրոք 1937-ին բավականին ծանր է եղել: Անզորություն զգացում, անհեռանկարայնություն... ու արհամարհանքի, զզվանքի: Իսկը՝ գաղջ: Ծանրության զգացումը խեղդում էր: Անընդհատ մտածում էիր՝ մի՞թե ազնիվ մարդիկ չկան: Կա՞ն: Ո՞ր են: Ազնիվ են երևի միայնակ, իրենք իրենց մեջ:

Իրականում շատ բան չի եղել:

Մեկը երդմնակալեց՝ շրջապատված Ռոբերտ Քոչարյանի, Արկաղի Ղուկասյանի ու Բակո Սահակյանի փայլող դեմքերով (ևս հինգ տարի «գարանտիա» նրանց համար, դահլիճում իրականը այս չորս էին): Երկրորդը խոսում էր քրիստոնեական արժեքներից: Արդյունքում աղոթեց իր զորավարի հետ: Վեհափառը վերջնականապես վերածվեց Վեհի:

Մենք մի քիչ ծիծաղեցինք, մի քանիսը մարզերից եկան Երևան ու այդպես էլ չհասկացան՝ ինչու: Մի երկուսի գայրույթը կրկնապատկվեց: Մի երկուսը էլ ավելի շարացան: Մյուսները՝ ավելի անզորացան: Շատերը հայրենասիրական կենացներ խմեցին ու երևի Տիգրան Մեծին ու Ղարաբաղը հիշեցին: Մի քիչ Ստամբուլը արյան ծով սարքեցին: Ասեցին, որ հավերժ եղել ենք, հավերժ էլ լինելու ենք ու հետո նստեցին իրենց Գ55-երը ու գնացին տներով:

Օրը մթնեց, անցավ: Արթնացանք Արշիպելագ Հայաստանում: Ու դեռ երկար ենք արթնանալու:

Ու երբ ասում են, թե սա սկիզբն է միայն, ժողովուրդը հասունանում է, սկսում է գիտակցել և այլն, և այլն... Ձէ՛, եղբայր, չէ էլի: Ժողովուրդը ես եմ, դուք եք, մյուսներն են: Հասունանալ ժողովրդին չէ պետք: Հասունանալ իշխանություններին է պետք:

Հասկանում եք՝ մահակներով շատ բան չեք ջարդի: Մի երկու գլուխ՝ լավագույն դեպքում: Ձեր ժպիտներով շատ ավելի մեծ բան կջարդեք, քան մահակներով: Հասկանում եք՝ ազատ ապրելու, մյուսներից չզգուշանալու, ազատ արտահայտվելու զգացումը չեք կարող ջարդել: Բանտարկել կարող եք: Ընկճել կարող եք, կոնյակին կամ գարեջրին կամ գլանակներին մղել կարող եք: Վնասել էլ կարող եք:

Ախր ազատ լինելու զգացումը շա՛տ է կարևոր: Ախր հակառակ դեպքում ես, դուք, մյուսները զգուշանալու ու հետո էլ վախենալու ենք, նախ՝ շրջապատից, հետո ընկերներից, հետո հարազատներից, հետո ընտանիքից, հետո ինքներս՝ մեզանից, ու սկսելու ենք մատնել: Բոլորին մատնել: Վերջում էլ մեզ ենք մատնելու: Ու հետո գալու է 37-ը ու մեր գերեզմանն էլ երևի մեր ձեռքով ենք փորելու: Իսկը Արշիպելագ:

Անընդհատ մտածում էի, որտեղ եմ գրելու Վարագույր: Չգրեմ երևի: